

是程堂二集

以摹形形以傳神神理畢出無豪髮爽鏡之爲用止矣而我之所以爲我者顧猶不在是然則何求而可今夫耳有所以爲聽目有所以爲視口輔頤頰有所以爲動鬚髯有所以爲張體段之肥瘠顏色之美好老醜有所以爲變嬉笑怒罵憂思愁苦有所以爲慄然赫然悄然而皇然者視其中之所存而發于不自知詩愈工則真愈見其中之所存愈不可掩此余之所以不能無悔也客聞余說笑曰然則子近日之詩視前日奚若曰無以異也然則奚悔曰二十四歲以前之作寫真之未似者也三十以前之作寫真之近似者也近十年所作攬鏡以求似者也耳目口輔頤頰鬚髯之屬之可見者固無

以異也而有其異者在則余固所嘗求之而未至者也
求之云何性情學術器識度量是已雖然性情學術有
邪正器識度量有遠近大小不可不辨也工詩者如中
酒小醉則小工大醉則大工醉則吾胸臆所不能吐夢
寐所不能通者胥纖微委曲婆娑顛倒隱約流露于意
言之表夫是之謂真詩而有我余進而求于是者有年
矣所謂本諸性情學術者其果罔弗正乎見諸器識度
量者果遠且大乎將小醉而小工乎大醉而大工乎余
今自得之而自求之以庶幾將來一日之進境其終能
至焉與否未敢知也聊書之爲二集自序以質諸世之
知我詩者當更有以進之以無貽他日之悔可乎嘉慶

廿五年夏六月潛園漫士屠倬自序

是程堂二集卷第一目錄

張孝女詩

船田庵四面皆水叢篁灌木翳之

姚春木椿過訪却贈

送樵山入都

江上還有作

秋夜

同劉申甫太史姚春木金手山兩上舍游資福寺

還過妙吉祥院坐華嚴壇二首

孫淵如觀察五畝園落成同人小集三首

隱仙庵看古梅贈王樸山尊師二首

同樸山尊師默然長老登千佛嶺

土橋

東園拂雲亭舊址今爲文昌祠俗名梓潼墩登覽

成詠

楞伽院東坡寫經處

伏生授經圖爲孫淵如觀察題

施辛蘿舍人過訪遂同遊白沙翠竹江村

慈蔭寺贈古松長老

仰酬錫山協揆師寄題拙集一首

題畫水仙三絕

贈陶雲汀漕使卽題皇華集後二首

秋晚雜感三首

伊墨卿太守卒于揚州其去官于此十載矣郡中
士大夫爲設位三賢祠以配前哲傳未及與祀
賦詩以弔

東小獻二首

刈菊

藏花

病樹

官山頂二首

雪中望方山

謁黃靖南墓時北山祠宇告成賦詩以慰侯靈

于役京師夜泊邗上受代旬日轉覺閒適

淮陰釣臺

題郭頻伽靈芬館第六圖

題家子垣青山歸趣圖三絕句

人日寄故園梅花用薛道衡入春才七日爲韻同

頻伽壽生作

前詩誤用才字韻爲方字補成一首

穀日立春答頻伽見示之作

陳曼生同年贈新製陶壺數事各系以銘刻畫精

好攜置行篋中終日瀟茗相對賦詩却謝

感春五首

晚飯畢書此遣悶道中并蔬菜不易得萋蒿杞苗
小僮向野中掇拾歸

題任城太白樓

守牖

上牖

洪石農觀察

範

畫山水墨竹五幅見貽報謝

彭口

題王石谷畫

題董文敏仿黃子久沙磧圖卷次虞道園題灤陽

雪溪卷韻

開甕得佳釀獨酌舟中無日不醉

題畫三絕句

雲栖同小湖積堂

此首迄擬王兵馬司二角鷹歌前集偶遺今補錄

訪小湖萬峯山房兼贈心舟長老

畱別陳荔峰學士朱芑堂兵部卽次見送原韻

周生招集鑑止水齋看牡丹分韻

同穀人春松金溪三先生集湖舫分韻得船字

擬杜工部王兵馬使二角鷹歌

聞南雅師歸田之信賦此奉懷

題牧牛圖

是程堂二集卷第一目錄

是程堂二集卷第一

錢塘屠倬 孟昭

張孝女詩

并書事

孝女姓張氏名巧姑儀徵人父曰天相病痺不能起立兩兄傭他所孝女獨與父居乾隆甲子正月十八夜比鄰不戒于火火延及門孝女狂號負父出未及門而仆與父俱死年十有四明日出其屍灰燼中猶肩承父屍握父手弗釋邑人建石幢書孝女死父狀誌其處嘉慶三年戊午縣丞申君淑泮濬渠得故所立石幢土壤中大驚則與邑令申其事于督撫以聞于朝始

得旌典于是邑人爲立祠三楹于其所居新柏街奉粟主焉又十二年庚午傳適來宰斯邑過孝女之祠而拜焉且感申君之知義也旣而戚然念孝女死之日去濬渠得石請旌之歲才五十四年耳而事已不傳于父老石且仆土壤中今雖祠易朽土木之不堅于石可知也脫再數十年且廢誰爲申君者念惟文字可以傳久與金石比然攷建祠時兩淮都轉運使今貴州巡撫曾公嘗爲文與詩表之載公集中今讀前令顏君續撰邑志書孝女事僅數言耳已不載曾公文嗚呼此傳之所以戚然增感也昔漢

上虞曹娥入水求父屍而死年亦十四至今祠
祀江上近二千年不廢後世曹娥比者或不乏
而曹娥之名獨著且重豈不以邯鄲淳之文有
以傳之又得蔡中郎之題益重其文而傳之耶
夫時有遠近忠孝天性無古今千載上有曹娥
千載下有張孝女其事相類而吾獨悲夫孝女
之石數十年而已仆父老不能傳也傳不文不
足以傳孝女故僅書其事不敢爲碑辭顧亟書
其事而反復致意于傳不傳云爾者冀當世文
章之士感余言必有能爲邯鄲淳蔡邕者以與
曾公之文竝傳孝女于千載也雖然孝女之死

旣上旌于朝矣卽不以文辭傳吾知孝女之
目已瞑固無媿于曹娥而吾之汲汲思有以傳
之者欲天下後世之人聞孝女之風而興起知
忠孝天性古今人無不相及雖委巷童穉之女
遂爲曹娥不難也旣書其事復爲之歌

新柏街孝女死乾隆初歲甲子嘻嘻出出夜半呼頑風
不返孝女廬孝女者誰張巧姑父痺不能行排闥奪門
負以趨屋山傾頽震霹靂風自火出烟四塞孝女力弱
行不得肩承阿父與俱踣燎原勢方張烈焰照八荒彤
幢絳帷赤冠裳炎官雷公駿趨蹌赤虬吐舌如虹長火
馬辟易走且僵嗚呼我孝女曷不被髮血面訴彼蒼孝

女感我言上論天帝側祝融之神帝所敕胡肆其虐罪
應斥帝聞孝女言太息孝女賢汝冤不可雪禱神之鬼
爲汝前孝女感激涕泗漣帝命錫孝女天門鼓闐闐霓
旌而霞車導我孝女前孝女還入門焦髮賴日暖抱持
父屍招父魂魄今歸來說煩冤里神社鬼左右奔護孝
女屍骨尚溫至今新柏街人稱孝女里里人爲築祠春
秋有專祀嗚呼孝女之孝古誰比孝女十四死于火曹
娥十四死于水

船田庵四面皆水叢篁灌木翳之

曲水周牆下危橋一木支更無他徑入不獨早秋宜竹
密僧寮隱沙崩岸柳欹我來閒拄頰青對遠山眉

姚春木椿過訪却贈

十二年相憶今宵一舉杯馬班知可作君方著史錄屈宋有

餘哀心跡傾吾黨風流壓霸才未應分出處吾亦賦歸來

送樵山入都

都下論交日余方作選人君今入郎署而我尚風塵幾樹淮南柳頻年江上春離愁更何處曉夢逐車輪

江上還有作

彈琴青山巔白雲爲我畱行吟秋江畔啼鳥爲我謳我琴多古調我吟多古愁泊然與世遭六年此眞州城頭楚山青城下淮水流百事成坐廢塊然長獨游我生仕

與學兩者當誰優無優則已劣速我悔與尤行年三十
五鬢毛颯成秋昨鑷一莖白如草萌蘖抽一髮不足言
早衰能勿憂肺肝我自知百慮日雕鏤勁風振霜林潛
浪翻長湫此身非斷蓬此心已虛舟胡爲不早計一聽
沈與浮

秋夜

淮南秋思初雙鬢越絕鄉心又幾年酒醒不知狂有態
愁深只覺意難傳歲時豐歉關民食骨肉團圞樂得我憐
竟夕低徊高燭燼去畱身世兩茫然

同劉申甫太史姚春木金手山兩上舍游資福寺
還過妙吉祥院坐華嚴壇二首

逃禪非醇儒結習笑我輩心遊化人居隨境得自在江
天正蕭寥秋氣蘇病肺招提晚鐘聲稍稍近官廨出門
占同人觀空證無礙老僧勿將迎浮雲此冠蓋淨土何
莊嚴香林絕埃壒周垣列萬竹勢若風雨會登樓眺羣
山擁髻立江介恍疑湘靈來顧我矜盼睠攬勝超目前
託興寄方外何當謝簪纓僧衣學膜拜

出寺迎夕陽窮巷路西轉高柳未變衰樹樹積蒼蘚道
人慕冲虛未肯學符篆築亭水石間柴扉終日鍵石橋
跨池平秋水落已淺永懷莊列徒觀化行自遣華嚴現
彈指晴雲碧空卷洞達十二窗暝色赴遙眄塵勞間歡
悰嘉會近來鮮幸茲一日閒何苦身縛繭

孫淵如觀察五畝園落成同人小集三首

卜居依白下學道誦黃庭五畝園新闢六朝山自青
賭棋開別墅阻水作危亭許我頻移榻松風兩處聽

先生舊築

五松園隔一街耳

白傅廬山記王維輞水圖幾人來問字有鳥勸提壺婚
嫁粗能了田園幸未蕪宦成歸子舍白髮挽耶鬚

野徑梅花發春盤菜甲挑鶴糧增舊額鵷侶話同朝

施奉

泉學士唐陶山觀察同集

酒熟朋簪盍泥融臘雪消雒陽真率會佳

話又今宵

隱仙庵看古梅贈王樸山尊師二首

青山依舊六朝色想見當年陶隱居春雪者番晴更好

梅花一笑淡相於蛟龍滿壁看題字鐘磬諸天聞步虛
我愛軒轅狂道士大言不解世人書

老梅不識歲月古閱歷太平今幾朝若爲花下辨鶴跡
祇許客來懸酒瓢江水無聲抱孤月嶺雲作意卷晴霄
舊時老輩幾人在剩有道人白髮飄

樸山工詩善鼓琴與袁簡齋嚴冬友

王夢樓諸先生論詩

同樸山尊師默然長老登千佛嶺

松陰不埽石盤陀趺坐中峯隱薜蘿佛老之間吾道廣
齊梁以後劫塵多人天說法花如雨世界觀空歲擲梭
底事未除文字障依然居士病維摩

土橋

游倦一傾尊燈前與細論夕陽何處寺深柳幾家村野
衲忘迎送春禽解語言橋陰穿溜入只惜帶潮渾

東園拂雲亭舊址今爲文昌祠俗名梓潼墩登覽

成詠

名園水竹已蒼涼三絕碑曾燬靖康

歐陽修撰記蔡襄書梅堯臣賦詩

自昔江城畱宦蹟至今星象煥文昌地鄰安石新營壘
我愛元龍舊築塘後日視今今視昔一般懷古弔斜陽

楞伽院東坡寫經處

一樹桄榔夢已圓生還靖國紀元年寓公且喫門冬飲
古寺曾題慧日泉玉局頭銜虛拜命金經手寫久逃禪
廬山亦有圓通偈絕筆傷心一月前

公以是年五月至真州先是四月舟

行寫圖通偈送付廬山至七月卒于常州米元章訪東坡寓館卽眞州東園有送門冬飲詩慧日泉亦公所題

伏生授經圖爲孫淵如觀察題

齟齬老翁神觥觥髻嬌女音琅琅二十八篇追秦亡
北面跪受鼂太常臨風展圖熱辦香先生得母今孔光
蒼萃古今絕學昌廿年卅卷羅縹緗時先生所撰尚書古今注三十卷始
刊行餞者柴誓舉所詳經師目無快觥陽自謝好學炳燭
明叶繡閣傳經粲成行玉雅義挂教授堂以手摸絹忘
形相曷不儕我歐陽張同乞書注充儲藏

施辛蘿舍人過訪遂同遊白沙翠竹江村

白沙江頭春色新眞州城下水粼粼花飛底急鶯自語
潮落無聲鷗已馴文字因緣傷闊絕別離身世笑風塵

佳遊此段肯容易相對十年前故人

慈蔭寺贈古松長老

古寺翳松色暮鐘山下聞無心看流水獨往伴孤雲小
院藤陰合斜陽花氣薰阿師忘世法啼鳥爲殷勤

仰酬錫山協揆師寄題拙集一首

韓門衣鉢託平生廣樂鈞天仰正聲白髮兩朝霖雨
徧黃扉一集午風清

師著午風堂詩集行世

敢誇碧海長鯨掣忽

動丹山老鳳鳴愛惜琴材斲焦尾十年前已負裁成

題畫水仙三絕

凌波無跡杳難尋夢繞湘江深復深
隱几夜闌瑤想濶呼之欲出古桐琴

隱現湘娥十二鬟捲簾星斗挂闌干冰蘂添注水扶寸
中有烟江萬頃寬

藐姑冰雪原無質淨熨霜縑不敢揩清曉含毫邈然坐
墨痕狼藉趙彞齋

贈陶雲汀漕使卽題皇華集後二首

萬里詩篇入蜀新雲開華嶽接峩岷從橫秦漢以還事
俯仰韓蘇一輩人漕挽此來歌得寶霜威前已重埋輪
先生相士如相馬況我鹽車方苦辛

報國文章動帝閣使臣心事託輶軒秦關馬上

百二險雲夢胸中八九吞生面能開杜陵老微詞如答
楚騷魂竭來淮海重持節把卷尊前與細論

秋晚雜感三首

翦燭坐秋深，崢嶸減壯心。
風高羣木震，雨急萬蟲喑。
嗜退名俱淡，工愁病早侵。
鬢毛看漸短，不合玷朝簪。

歲月滄江逝，風烟古木遒。
駐顏非太藥，散髮任扁舟。
訟起隍中鹿，機先海上鷗。
牢愁底須遣，且與杜康謀。

鶴怨何時釋，鷗盟莫更寒。
此身真鹵莽，入世故艱難。
指澀琴心苦，身羸帶眼寬。
浮雲工幻態，一笑等閒看。

伊墨卿太守卒于揚州，其去官于此十載矣。郡中士大夫爲設位三賢祠，以配前哲。倬未及與祀。

賦詩以弔

歐蘇以後復新城

祠祀歐陽文忠蘇文忠及國朝王文簡

不獨文章且政

聲遺愛卽今崇配食一官于此見生平辦香遠接人千

古絕筆驚傳真兩楹

先生書居處恭執事敬與人忠九字見贈字大徑尺餘不數日聞訃

蓋絕筆也

淚灑平山堂下路民情厚似故人情

桃花菴裏餞公時肯信三賢共一祠

王申夏先生病起入都余餞之桃花

菴未渡河仍以病還迄今又三年矣三賢祠先生處也

平山堂下後祀移置于此卽余餞先生處也

論到

蓋棺今已定世無良吏我誰師蜀岡西望空憑弔淮水東流有去思慘淡靈旗颯風雨神絃歲歲薦江蘼

柬小獻二首

孟冬十月天氣暖繞徑黃花蛺蝶飛陡覺中宵逼寒信始知一雪釀風威先生有道久齊物白首何人甘息機笑指窗前幾竿竹折腰心事與人違

斗室維摩自在禪
半年藥裏與周旋
苦吟相慰病良已
痛飲澆愁情可憐
非我非魚有同樂
學仙學佛且隨緣
正須手作平安信
爲報高堂一粲然

刈菊

那不傷幽獨
殘花臥雪中
埽除同槲葉
采掇到山童
帽已前番落
樽休此夕空
瓦盆須愛護
明歲足秋風

藏花

斗室藏春密
盆山得氣偏
盈虛一太極
色相此枯禪
肯競唐花暖
聊分小草妍
歲寒交不淺
風雪自年年

病樹

東郊見病樹
入我苦硬詩
寒綠沉夕陽
瘦陰臥清池
磔

柯剩節目聳異存孤危剝中空腔朽裂杈老幹歧蟲篆
雕腐質蟻迹緣高枝猱飈拔厚土野火燒叢祠厥狀故
自醜造化終洩奇託身巉巖中空負雨露私念彼拱把
初不解老大悲明堂需棟梁翦伐所不辭文章孕條理
繩墨中矩規萬牛挽不得千仞庶可期枉尺旣自較不
材還自疑坐令芳華歇忽已柯葉墮潦倒在中野嘲笑
雜小兒崩沙齧根穿碎石刻骨斨孔疑燧人鑽枿或樵
斧斯枝攣苦胼胝苔蝕攢瘡痕割耳僵乖龍灼背鬻老
龜窟竅穴狡兔蒙密啼怪鴟鑿齒足半廢齊女癭倒垂
殺霜露髣髴溜雨蒸黴黧煩惱葛藤縛枰擊霹靂馳枯
禪心欲灰山鬼魄共褫風烟幾撼頓苴成疋羸莊周

棄臃腫庾信嗟變衰生理雖未盡匠石久見嗤徒憐溝
中斷敢泣爨下炊我爲病樹歎復爲病樹思空山多老
壽蒙泉養華滋磔卓天所全靈怪世肯遺先春幹元氣
改葉還故姿榮悴倘齊物閱歷方在茲保此堅多心毋
斲而小之

官山頂二首

鄰封有期會塵事亦偷閒風雪寒攜酒籃輿飽看山靈
巖孤塔下鐘阜斷雲間多少蒼茫意微吟一破顏
經時阻游眺此日已嚴冬小徑封殘雪層陰結亂松地
偏人作苦山靜鳥從容燈火勞相迓歸來及下春

雪中望方山

雪後見奇表孤巒如削成圭稜寒更出氣象晚逾明直
木何妨瘦他山不肯平幾家村落遠無事掩柴荆

謁黃靖南墓時北山祠宇告成賦詩以慰侯靈

廟貌方新日松楸已鬱然死生捐馬革母子共牛眠事

去朝廷小魂歸骨肉全似聞風雨夕靈爽久安禪侯母徐太

夫人妻翁夫人同壙中墓側爲楚天寺余給札令寺僧世世守護

于役京師夜泊邗上受代旬日轉覺閒適

簡書可畏王事重況悴不辭天氣寒水宿經年聊泛宅

身閒一日且加餐民情已向離官見士民設香燈送者充塞衢巷至有泣

下者世事都從失馬看只念老親衰病日淚痕臨別背兒

彈

淮陰釣臺

全楚三秦定指揮投竿而起亦恢奇功成蕭相追亡日
禍中畱侯躡足時卓識寧居蒯通下此心不負漢王知
富春江上披裘者一笑甘心作釣師

題郭頻伽靈芬館第六圖

默存已歷化人居怪底塵寰陋積蘇廣廈畢生懷杜老
行窩隨地着堯夫小樓近翦吳淞水君所居小別墅重
題輞口圖第一圖余先有詩笑我無貲辦二徑草堂松菊久荒
蕪

題家子垣青山歸趣圖三絕句

賜鑑湖一曲水買陽羨二頃田兩家各有舊業曰歸知

是何年

余家越中子垣家昆陵其先公嘗宦秦中

祖德詩述康樂族譜亭記睂山子弟人人有集烏衣馬
糞之間

相逢話別今宵春水秦淮頂潮遲我一年歸計煩君先
訊漁樵

人日寄故園梅花用薛道衡入春才七日爲韻同

頻伽壽生作

一官困風塵八載別鄉邑豈不懷故園家已四壁立中
庭兩樹梅此日遙憶及幸未供樵蘇翠羽肯來集云何
久乖違戀此升斗入倘藉驛使還寄語行請急

請急未有期于役悲苦辛孤芳不可掇眷言及靈辰蒼

龍斗杓轉尚遲一日春河冰凍如山欲渡還逡巡昨夢
西溪還溪水波鄰鄰行吟梅花下邂逅如故人墜歡渺
難即醒臥清淮濱

淮濱多風雪羣木不肯芳亦有好園林凍蘂半已僵何
如故園好及時媚春陽林逋孤山宅張氏玉照堂繁枝
弄晴昊對花盡十觴客中非無酒無花似吾鄉無花且
須飲除酒無樂方

樂方故非一催花苦乏術健步遠未來戲喚殷七七噓
枯與吹生俄頃亂花發恍惚千娉婷環佩下瑤闕羈魂
交百感幻境隨起滅胸幹太古春生氣彌斗室

斗室雜蓬蒿僦居歷旬日同此逆旅中忍使趣離別郭

侯歲寒交行芳與梅匹同作寄梅詩平生久齊物我行
別君去君歸亦難必未能忘梅花何況與君暱誓將遁
空山窮年臥冰雪

前詩誤用才字韻爲方字補成一首

憶梅憶故園故園手自栽此外更何有最憶江邊梅謂真
州宋梅冷落七百年近歲我見才別來未云久曾否南枝
開花開我方北誰與花徘徊詩成并寄似母令江梅猜
穀日立春答頻伽見示之作

東風已報轉檣烏火急方催使者符客裏逢春感時節
酒邊惜別話江湖鬢絲惱我欺幡勝褰手看人喝雉盧
虛約更番作傳坐試鐙前後已征途

陳曼生同年贈新製陶壺數事各系以銘刻畫精

好攜置行篋中終日瀟茗相對賦詩却謝

篷窗吸茗終日坐自出風爐煎活火偏提手自斟酌之
重自陳侯昔貽我知君胸有太古春土坯搏出栗玉溫
規模自足撰壺史肯訪龔春時大彬沈沈閃色兼栗色
貫耳提梁具精式東坡石鈔故自佳我却少驚宜汲直
石鈔汲直皆君所贈壺名其餘古樣皆樸緻陶寶圖中出新意選泥
合是趙莊山祕傳尚說金沙寺雕鏤五字銘故姬讀君
款識尤瓌奇陳三猷子仿鍾帖明陳用卿製陶壺款仿鍾太傅帖人呼陳三猷
子何似先生沙畫錐錦綈包裹光整眼手注春芽不須
揀桃花水試歷下泉壓倒碧甕官字殘

感春五首

沿隄破屋不翦茅游蜂輩出春風驕春風作意惱行客
柳花滿店青帘招開殘紅杏開山桃自甘寂莫投荒郊
當爐女兒自矜許眉黛不學城中描

春風吹人兩頰紅村筠新壓桃花濃提壺對語勸行樂
交枝隔葉比鄰通提壺解勸不解飲樂意自領春風中
我今況有酒百榼那不醉倒如山翁

去冬乘舟下江淮雙門控閘聲如雷離家三月不千里
顏鬢苦被風塵埋春光相樂更相惱夢與俗浪爭喧逐
繁紅滿眼會須盡風豪雨橫今宵催

青蟲蜷局自吐絲風吹化作蝴蝶兒童騃空手撲不得

高飛却成粘網悲人生何事苦束縛臨風慨歎無人知
春光漸老不成醉枝頭一昔殘紅吹

船頭颯颯風吹沙行人席帽當頭遮狂紅滿地汗顏色
夢魂顛倒隨飛花側身南望天之涯路長較似春愁賒
家書對酒不敢讀老親親筆呼歸家

晚飯畢書此遣悶道中并蔬菜不易得萋蒿杞苗
小僮向野中掇拾歸

今年北地無筍喫日日飮盤只蘆菹長河那便食無魚
却少刀魚與鮮鯽自來枯腸成破甕嚼慣冰菹齒牙凍
柁樓晚飯雜編郎竊怪先生一笑闕爾曹那測先生樂
灌園且學於陵仲我顧爾曹翻失笑賦芋日速羣狙訟

將軍之腹不負余太倉之雀我媿渠但得食籍注藜苳
何用頓頓求花豬庖丁解事進杯酌碎切萋蒿作羹臠
杞苗軟脆韭芽白略糝吳鹽嫩湯滌今年大麥斛千錢
山東河北皆豐年團團蒸餅裂十字一飽已誇吾腹便
君不見故鄉櫻筍此時候正好砂瓶煮蠶豆

題任城太白樓

長歌短歌天地間耳目一闢萬古頑糟邱築就高于山
挾別蜀道開秦關春風吹得詩魂醒手把蓮花來玉井
披雲顧我開口笑那得相逢不相省憶從金陵鳳凰臺
別君滿酌鸚鵡杯人間遊戲不稱意探奇却向東蒙來
高樓摩空切雲起樓柱亦中千年材怪君此別爾許久

幾度清淺窺蓬萊桃花一笑江南春酒邊記得逢汪倫
功名早付郭中令恩怨何有高將軍古愁不可說楊花
飛白雪騎鯨歸去來回首海天濶慷慨梁父吟縹緲廬
山謠我欲從之訪松喬晴雲卷舒迴碧霄鸞車風馬不
可招高歌贈君君肯答天半親切聞鈞韶

守牖

仕宦觸駭機行役滯風浪裁編十丈長連檣屹相望漕
河控牖門據險若亭障怒流竹箭奔鍵石搯其吭蓄水
如蓄金尺寸爭較量自非使者符火急不容放舟行逾
半年一步一惆悵昨夜夢滄江輕搖米家舫

上牖

水性本至柔抑遏勢始橫束版文許懸力軋萬鈞勁盈
縮高下殊滲漏昏曉偵當其啟板時蛟鱷皆退聽奔流
數十里一溜奪門迸大聲震霆厯疊浪雪山映逆流而
挽舟激觸怒更盛沸鼎徹底翻拔山詎力勝轉轡轉長
絙夾岸百夫競繩斷萬斛沈破碎如墮甑余督運銅船
二十號前于
利運開沈一舟
溺銅六七萬觔心魂夜夜驚險阨處處更忠信敢自陳
微軀荷

王命

洪石農觀察

範

畫山水墨竹五幅見貽報謝

記從蘇齋讀公畫滿壁驚飛雪堂雪

前在覃溪先生蘇
齋見君所畫坡公

故事十年夢想只神往此日相逢況心折烟雲落紙故生

動山川聚米還能說歸來戎幕萬里輕坐擁秦關一麾

出

君嘗佐福郡王幕繼官潼關太守

竭來齊魯作監司笑指春風吹白

髮杜公南池動遊興往往看山頰支笏蔽天帆檣夾漈
河船舡往來相戛摩爲公小住裁半日公乎貺我何其
多殷勤手致出懷袖篷窗回首增烟波懽呼水次詫騶
卒指點疊嶂青浮螺公其知我動歸思更請添箇人披
蓑興來還與寫墨竹雨雪風晴分四軸定知造化在胸
中能使籀龍皆攝服就中一竿尤勁直如對先生好風
兒忽忽走筆媿公意正須噴飯簞簞谷

彭口

朝來繫船向彭口幾點青山落吾手水雲只逐帆葉飛

春風能知客心否湖光浩蕩接天遠山色低昂向人久
晚霞殘照畫不成欹側垂楊媚魚鬣

題王石谷畫

我初學畫學檀園頗將筆墨破籬藩誠齋詩格正相似
自謂當在二子間中間學詩學蘇韓畫法一變求董源
董源筆力遠難到亦如詩學蘇韓難華亭尚書具魄力
平心靜氣學始得千唐白傅宋放翁自有性情驅筆墨
詩源未可劃唐宋畫派終須合南北虞山王翬其庶幾
杜法且傳黃魯直

題董文敏仿黃子久沙磧圖卷次虞道園題灤陽
雪溪卷韻

千巖萬壑山陰道鑑曲風光懷賀老今朝始識塞外山
俯視長松作蓬葆關門想見西風早一派寒潭淨秋潦
請看飛瀑挂天紳還有晴雲披絮帽

開甕得佳釀獨酌舟中無日不醉

取醉不盡器痛飲裁一升或當比小戶未可成獨醒白
傳終日飲醉吟迭相仍不知其量何而以醉吟稱蘇公

三蕉葉過此已不勝自分欺淺懦肯以醉求名

坡詩有
自分酒

杯欺淺懦又云江左
風流人醉中亦求名

我茲日無事所樂惟杯鐺舟行逾

半歲纍纍積瓶罌十日盡一罌一日應幾觥積多故自

少由漸以取贏念彼爲善者正以積纍成過又豈不然

敢使毫髮增今日新開罈芳烈遠彌馨辛辣與軟熟只

合醉老僮吾酒今何如聖賢分濁清嘉王悲可憐次公
狂可憎庶幾公瑾醇使我心和平

題畫三絕句

人倚一枝櫓雁銜三尺蘆長天界秋水清夢落江湖
青山塞茅堂飛泉導其脈蘚徑不逢人曉來尋鶴跡
長松矮如薺遠山橫似眉平湖一千頃芥子落須彌

雲栖同小湖積堂

此首迄擬王兵馬司二角
鷹歌前集偶遺今補錄

聞思泯喧寂信步忘淺深再來此山中得句不敢吟竹
密以萬計磴絕懸百尋豈惟衣裳綠鬚眉亦沈沈禽言
答清楚溪流韻瑤琴吾心本無垢未要洗吾心

泉上有
洗心亭

訪小湖萬峯山房兼贈心舟長老

獨抱孤雲宿楚然喜可知山深聊獨往園好不曾窺
早飯投香積空瓢挂樹枝從君攜酒舫醉倒阿顛師

畱別陳荔峰學士朱茱堂兵部卽次見送原韻

暫作金臺挾策行一時離思酒邊生匆匆舊雨初聯轡
渺渺飛花又滿城已愧才名輸屈賈敢誇豪氣近幽并
文章報國諸君事鄭重今宵車笠盟

周生招集鑑止水齋看牡丹分韻

排日鬪吟觴流蘇四角張大花分餉客傾國此嚴妝
錦帶爭墩戲雄蜂課蜜忙畫闌風色暖插帽笑清狂

同穀人春松金溪三先生集湖舫分韻得船字

共鬪秋光擘矮箋冷紅猶媚半池蓮故人小別三千里

此樂于今五百年

用坡公黃樓語

白葛輕纖誇芰服碧筒深淺

較觥船風流輸與旁人識李郭同舟望若仙

擬杜工部王兵馬使二角鷹歌

秋清木落萬象出平原草枯吹簫葉生瘳老樹塵勁風
廣場浮雲莽蕭瑟漁陽突騎來朔方射生健兒擊黃麋
臂鷹一雙飢不颺竦肩側目睨秋曉星精下燭垂瑤光
兩鷹角立爪距藏骨鍊萬里之風霜將軍愛鷹如愛士
鷹與猛士爭軒昂風塵擺脫去無迹草間兔肥稍健翮
摩空不數決雲兒礪吻欲過房山白將軍愛士如愛鷹
士馬作氣俱飽騰豺狼當道肯一擊天寶開元方中興
嗚呼此鷹此士俱才能

聞南雅師歸田之信賦此奉懷

六詔雲山話起居西河老淚痛難除

先生一子前歲歿于雲南學署

文

章道重千秋業骨肉恩深萬里書出處無慚對猿鶴鄉園有夢託耕漁十年師弟關心事早已商量賦遂初

題牧牛圖

春畦雨足泥破塊繡徧田塍紫花碎綠楊夾覆高下坡黃犢鳥犍不成隊老翁圓笠獨速衣牧兒丫髻橫竹吹老牯步遲犢健走牧兒忽前翁忽後水深蹄沒牛不愁扶犁叱叱翁不憂林間布穀苦相喚秧歌拉雜牛鳴牟間來飯牛看牛浴浮鼻清谿戲相逐井亭四面綠陰濃翁已酣眠枕碌碌牧兒歸來牛背駝牛飢齧草兒唱歌

承平海寓二百載處處佩牛風俗改吁嗟乎老翁之樂
樂何如白髮田園終荷鋤不羨道傍叩角取齊相不學
市上騎牛讀漢書生兒得似黃犢健且喜殘年喫飽飯

是程堂二集卷第一

晉書卷第一
晉書卷第一

仁和陸貞一仿宋書并董刊

是程堂二集卷第二目錄

黃丈退庵子未喬梓招同郭丹叔潘壽生夏慈仲

集友漁齋分韻得與字

丹叔招同人集山樊書屋分得是字

丙塘招同人集午餐卯諷之齋分得寬字

園梅已有消息

同人理安寺餞送青士之粵東

大雪觀池上鷺君石子秉有詩因和之

南湖觀梅歌同潘壽生明經作

次日復同馬秋藥太常南湖慧雲寺觀梅

自南湖歸秋藥先生壽生閑泉積堂同飲小園梅

花下

吳棣華前輩王竹嶼吳兼山二通守同過潛園觀
梅卽席成詠

花朝祀潛園花神作歌

泛舟入金家堰循臯亭山觀梅憩崇先顯孝寺口
占十絕句

游海昌安瀾園有懷亡友陳晴巖太史
雨中登烟雨樓

西磧探梅六首次沈文起廣文韻

夜抵光福同文起平叔虎山橋步月

集許鳧舟石契齋肩輿至菖蒲潭步梅林中三

四里彌望不盡卽世所稱香雪海也

茶山在梅花中北望銅井南臨太湖新建六淨閣

石壁瞰太湖在足下

沿西磧至石樓高山削天隙處皆梅花危坐萬峯臺湖中島嶼一覽悉盡

次日梅花漸落舫舟復招同文起平叔小城集聖恩寺之還元閣遂登銅井山絕頂

鄧尉探梅晤齊梅麓郎中沈潤生秀才相見歡甚別後梅麓寄詩三章訂遊華藏觀桃花不果往歸途依韻奉答

讀書示子秉

游柯山

靈隱守山樓觀飛來峯紅葉

登韜光

次日復游韜光諸君畢登余坐竹林以待

題趙次閑補羅迦室二絕句

獨步

湖上

曉起聽園中鳥聲二首

西湖秋柳和潘功甫

曾沂

孝廉

題焦山僧雪齋竹嶼吟秋圖

潛園消夏卽席

蘇公祠觀荷

錢蕙窗孝廉招集江月松風草堂嘗蟹殼泉
憶聖果寺桃

馬秋藥太常招集友多聞齋同訪南園遺址

楊鐵崖讀書處

景福泉觀察

謙

屬題雪泉圖

奚鐵生畫

西溪秋泛三首

陳孟楷茂才

裴之

招同人登御教場詠古

表忠觀看桂花二絕句

題徐上舍

廷錫

秋雪圖

魏春岑明經

景萬

出示蔡松原焦巖雪霽圖輒題

二絕

鄭書常徵士屬題二硯窩

王若溪孝廉招集吳山道院遂登丁仙閣

顧侯虎兒歌

并序

題潛園吟社圖四首

乙亥夏伊墨卿太守重來揚州訪焦里堂阮仲嘉

于雷塘墨卿仲嘉有詩里堂作雷塘話雨記不

三月墨卿卒仲嘉裝其詩爲一卷示余乞題卽

用兩君倡和詩韻

池上夜坐

盆池疊石藝花小有意致

偶題

湖上獨游

是程堂二集卷第二目錄

是程堂二集卷第二

錢塘屠倬 孟昭

黃丈退庵子未喬梓招同郭丹叔潘壽生夏慈仲
集友漁齋分韻得與字

人生會合那可數一別于今幾寒暑文人顏狀老愈溫
握手歡然認眉宇魏塘詩人皆舊雨雜坐無勞問賓主
由來別久交益親載雪衝寒敢辭苦天風蕭條撼庭樹
急景崢嶸感時序當筵各自哀樂殊薄宦歸來等羈旅
行將世事百不關結束芒鞋友桑苧更期五嶽汗漫游
婚嫁商量到兒女諸公聞言半可否爲我沈吟一觴舉
十年分袂今乍逢齷齪何堪籌出處翦燈重酌醉不辭

臥聽沈沈打街鼓天涯珍重此宵聚
嚙啗吟成非漫與
丹叔招同人集山樊書屋分得是字

兩年不能詩破例昨日始十年不見君
痛飲今日是窮
陰閼奇寒漸逼殘臘尾江湖倦游人聊爲諸公起孤篷
艤門前握手風雪裏情親到僮僕檢點及行李黃家與
郭家門巷隔一水重勞長者行無煩設杖几

謂退翁未往

我

來慶盍簪刺入煩倒屣顧茲良會難太息曷云已牢愁
會傷人憔悴看髮齒偶及文字飲淺率慚竈婢豈知諸
故人愛我不我鄙雞黍更番設詩筒排日遞靈芬遠未
歸誰當執牛耳不信天壤間有此村夫子

丹叔自號村夫子

飲

酣出篇章俊快追騶駟當其得意處直欲陵伯氏

謂頻伽

子未如子由筆亦阿兄似

謂霽青

尋常科舉士相勝或倍

徒奈何甘杜門曾不顧祿仕故知擅文章在此不在彼

座憐潘岳窮

壽生

鬢毛非昔比胸羅四部書詩歌特餘伎

前年大河濱送別一彈指驚看故園梅兩度今著藥

余在

袁江與頻伽壽生同有憶故園梅花詩

夏生從我游

仲慈

近亦六年矣其人

如六朝萬事等糠粃能爲小海唱不媿方聞士抗顏吾

豈敢三益差可喜惟余困風塵奔走勞役使本非鳳鸞

姿敢覬辭棘枳然而進退間才力固自揣況今罹百憂

途窮道方否所不能困余老氏曰知止不有馬少游先

我老鄉里誓將從諸君一雪薜荔恥畢力事鉛槧學稼

從來耜煩勞吐胸臆拉雜汙滿紙自請罰一觥杯盞須

更洗

丙塘招同人集午餐詠之齋分得寬字

樂府同歌行路難歸來仍著笋皮冠

丙塘近游黔中諸歷粵西以歸

公出處都星散此日心期重歲寒辛苦半生磨盾鼻商量活計把漁竿故鄉容易成高會況我頻驚帶眼寬

園梅已有消息

孤懷冷落久無詩籬落無端見一枝風雪尚畱殘臘在江湖肯負故園期狂來插帽應羞鬢曉起巡檐略展眉獨抱冬心守遲暮花前吟賞更誰知

同人理安寺餞送青士之粵東

山中且盡故人杯風雪江干莫漫催小別動關猿鶴念

預期飽啖荔枝回櫂歌穩泛珠江月驛騎剛逢庾嶺梅
束髮壯游今更好詩人例向嶺南來

君少侍先公宦游足跡半天下惟嶺

南未到余言近代如竹垞初白董蒲隨園未有不作粵游者君此行更令詩集增色矣

大雪觀池上鷺君石子秉有詩因和之

殘年大雪深閉門天遣玉龍來報春空中掉尾一欠伸
排闥頓失青嶙峋生獐怪石虎豹蹲爪牙伏匿空其羣
圭稜抹盡蘚痕澀飛白捲出礬頭皴此時獨立惟鷺君
羽毛潔白竟體純石耶鷺耶看不真玉骨一把不可捫
又疑湘靈踏波出雜綴瓊佩拖長紳縞衣羅襪不惹塵
絮帽蒙頭披嶺雲朝來相對發興新清詞飛屑羅繽紛
醉餘詩膽尤輪囷自坼甕泥傾瓦盆小兒吟苦亦解事

學聳雙肩作山字

南湖觀梅歌同潘壽生明經作

老梅開遲蜂輩出昨日已過挑菜節賞心樂事未渠央

賞心樂事張功甫所著又名四并集

六百年來吹一呖春寒浹旬風雨狂

看花却得今朝忙南湖溶溶動春意隔岸花多高出牆

花光照耀古佛傍主人誰識清河張綺羅寂寂豔香館

鐘魚隱隱詩禪堂故家喬木餘荒殿南渡江山恣游讌

若將王謝比門材慶承

韓平原園名

玉壺

劉鄴王園名

都不算將

家子饒名士風當年看花誰與同尤侍郎范參政更有

誠齋動高興幅巾藜杖足清臞一例詩人嘲薄命

功甫憶梅

詩云薄命詩人帶累花

我來且酌白鷗波醉倒花前一放歌依舊

小橋流水外玉簫聲絕奈愁何玉田過舊居有感詞云
望花外小橋流水門巷

惜惜玉簫聲絕玉
田循王五世孫也

次日復同馬秋藥太常南湖慧雲寺觀梅

排日看花花已繁朝陽特地弄微暄莊嚴佛屋成香界

點綴城隍似水村魚鳥破除生客例用功甫自
序中意貂蟬零

落舊勳門撐空鴨脚無人賞却得詩翁剔蘇捫後園古
木三株

南宋物也太
常極賞之

自南湖歸秋藥先生壽生閑泉積堂同飲小園梅

花下

花底罇罍結古歡花前詩格鬥清寒已逢迦葉拈來笑
肯負潛園醉後看萬玉玲瓏烟幕歷數峰青峭竹檀欒

坐中巾舄宜疎野自是江梅不屬官

吳棣華前輩王竹嶼吳兼山二通守同過潛園觀
一梅卽席成詠

六七株梅次第開花開政要客頻來喜無冠蓋驚鄰里
各有鬚眉照酒杯好句欲成呼筆硯殘英不埽惜莓苔
夜深不覺春寒重側帽巡簷更幾回

花朝祀潛園花神作歌

多生不參枯木禪有情合住散花天胸中生意浩如海
婆娑起舞春風前春風却與花司命吹得千花萬花醒
東皇太乙手握符昨來芙蓉城下呼欽哉帝命加九錫
管領羣芳春一國瑤臺玉京風露寒特賜平泉湯沐邑

空中雜沓迴雲輶靈之來兮相後先華髮纓絡五雜組
翠羽明璫十種仙綠章上達氤氲使臣本玉皇香案吏
卽今天地一家春朱草靈芝不勝紀辰良日吉百卉昌
有情無情皆樂康初筵請上千萬壽滿酌桂醕流霞漿
蕙櫨荷屋椒成堂荔帷蓀壁連葯房石家金谷施步障
裴公午橋開錦坊當筵一盞寒泉冽薦以菖蒲之九節
玉門赤棗元光梨粳屑瓊糜白如雪景光駘宕佳氣新
鶯歌蝶板來侑神道心了了觀化得動靜消息潛園春
泛舟入金家堰循臯亭山觀梅憩崇先顯孝寺口

占十絕句

買得扁舟恣意游但聞花處要畱年來一事無拘束

那有機心對白鷗

沿山一徑問梅花步入臯亭日未斜翠羽迎人作前導
不然迷了路三義

一段春陰一段晴花光半暗半分明繁枝怒發渾無次
翻棟橫斜少處行

枝頭一色綴瓊瑤恐是春寒雪未消詩便懶吟吟也得
且拖芒屨過溪橋

小徑穿花三五里但逢嘯鳥不逢人怪他士女傾城出
未放桃花不算春

有松有竹有人家總被花光一片遮香雪濛濛渾一白
玲瓏畫出短籬笆

幾家茆屋自成村兩派清溪曲抱門坐到月明休便去
城中無此好黃昏

鄉人種梅如種田手扶花影抱花眠樹樹交枝成女字
層層濕翠積苔錢

花梢透出寺門紅澹沱春痕染碧空彌勒逢人笑開口
一生跌坐冷香中

貪看潛園幾樹梅逡巡我出門來祝他鄧尉春如海
畱著三分最後開

游海昌安瀾園有懷亡友陳晴巖太史

出門游興尚飛騰高下山亭次第登
折梅花驚墜雪盪開池面聽敲冰
故家喬木猶今昔華屋山邱有廢興

偏又驅車成腹痛朝來那不鬢絲增

雨中登烟雨樓

欲騁南湖日高窗四面開雲垂帆掠斷風緊雨斜來獨
坐聊成咏當年此舉杯春光知尚淺沿路好探梅

西磧探梅六首次沈文起廣文韻

夜抵光福同文起平叔虎山橋步月

春風媚溪山原隰粲如繡近游陟蘇臺相隔幾亭堠孤
帆傍村卸寒月夾林逗川光如練曳山勢已輻湊共憐
清夜寂坐擁一燈守跨堰橫石橋壓岸列巖岫梅花了
無迹但見白雲覆暗香渡湖來風吹滿懷袖花間聳浮
圖雲際森結構言尋六朝寺清磬一聲溜

光福寺蕭梁時所建

集許鳧舟石契齋肩輿至菖蒲潭步梅林中三
四里彌望不盡卽世所稱香雪海也

萬花闢香海一室占詩窟訪梅兼訪友弭櫂及明發林
烟潤鬚眉薛徑濕鞢襪逼視光奪眸逆鼻香徹骨步隨
游蜂競心窮飛鳥沒勝踐歡平生始願積歲月幽蹊劣
可尋投隙不容髮冥冥四照垂芳意浩未歇朝暄困茸
裘春氣正蓬勃脫幘坐林間飽飯足筍蕨

茶山在梅花中北望銅井南臨太湖旁建六浮
閣

昔賢圖六浮高閣抗紫霄

李長蘅六浮閣圖曾見奚鐵生仿之

竹弓細彈

粉烟墨粗點椒老梅千萬樹布滿三尺綃披圖發遐想

惆恍心目搖十年夢茶山吟侶今見招縱覽林巒勝益
信畫理超飛英糝苔磴瘦影橫溪橋璀璨玉一團中貫
山之腰何當待明月花間度瓊簫沈沈左神居倘遣青
鸞要

石壁瞰太湖在足下

巨浸稽天來崖谷以虛受壁立劃城塹天半飛簫牡崩
湍咽神絃披榛掇鬼臼清譚悟懸解守意笑僂垢齧足
風濤洶壓頂松氣厚吐吞斜陽外雙崦若鉗口花香淡
薰人酣適如中酒蝴蝶隨風來更逐花片走忽聽晚鐘
聲一震無畏吼

沿西磧至石樓高山削天隙處皆梅花危坐萬

峯臺湖中島嶼一覽悉盡

闢境不厭奇游目詎周玩匝地花氣濃新晴鳥聲換窮

幽甘繭足摩崖怕脫腕

余題名其上

蝙蝠闖穴飛鼯鼯擲空

竄此時湖中山錯落堆几案烟水汨盪之浮螺忽星散
遠或分數重梭織帆影亂呼吸崑閬通割裂洲渚斷吾
身其騫騰彼水真浩汧自顧非河伯亦作望洋歎君看
萬峰臺花跼矗天半

次日梅花漸落鳧舟復招同文起平叔小城集
聖恩寺之還元閣遂登銅井山絕頂

幽尋戒鹵莽牽率況吾輩芒屨踏淨土幾點落花碎風
林靜含香烟鬟工作態山僧能飯客飮餌雜藪菜奇峯

表他山長松肅前隊羣峭排天閭哀壑春地碓花圍山
四面一白洞腹背娟娟莫釐峯擁髻澹相對其顛蓄澄
潭深碧若委黛似貫包山脈未可尋文概作達聊恣游
甚憊期勇退更約明年春蠟屐我能再

鄧尉探梅晤齊梅麓郎中沈潤生秀才相見歡甚
別後梅麓寄詩三章訂遊華藏觀桃花不果往

歸途依韻奉答

獨載餘杭酒言尋鄧尉梅遠春隨客到健步送詩來蠟
屐無緣共扁舟犯曉開

次日君上靈巖余往
銅井遂不獲偕游

相期更何

日長嘯上蘇臺

浪跡風塵外抽身簿領間譚禪邀白足拄笏對青山魚

鳥都親切鶯花不等閒多君重毫素小筆愧荆關
更羨蓉湖畔沿村只種花何嘗薄桃李不合負烟霞別
思縈官寺春愁付釣家因風寄遐想清夢落天涯

讀書示子秉

不讀五千卷不得入我室大言好欺謾空咋小儒舌四
十八萬言四年半可畢古人惜分陰程功計時日吾生
號爲儒百事付蹇拙日坐故紙堆避勞而就逸懷鉛任
點勘善本校精覈插架萬卷儲頗自定甲乙淫書固天
性資稟苦下劣掩卷輒已忘所得不償失窮幽險未通
沿流源已竭譬欲窺堂奧曾未及門臬我聞古之人經
世重學術立言蘄不朽相兼貴華實奈何世風卑徒事

工剽竊爭效懶祭魚自詡蜂釀蜜斯文雜榛蕪古義付
滅裂甘爲利名餌巧取耳目悅方今 文治隆比戶絃
誦密嚴徐與東馬濟濟方輩出研都鍊京手豈不號人
傑求其濟世用通方已難必遂令文士輕舉世笑迂闊
匪書能迂人其病在無物吾衰日荒落救過不遑恤所
歎者汝曹歲月甘自佚忘憂與忘食憤樂在所發懶惰
不自懲吾言徒取聒

游柯山

危崖百仞高切天架空結構僧房偏垂垂裂破凍雲色
面面摺疊屏風聯苔封曲磴筍避道犬拒生客門虛鍵
一泓潭影深見底萬竿竹色青梢烟當門一峯立平地

上隆下殺爲規圓峯高十丈與佛等紫雲常覆香爐巔
俗名香爐峯寺內石佛亦高十餘丈舊游屢過已陳迹得句惜未摩崖鐫
空山嘯咏和者寡笛材誰覓柯亭椽

靈隱守山樓觀飛來峯紅葉

名山初悔十年別古寺重畱三宿緣秋樹晴披錦繡段
風泉響答聲聞禪諸峰暝合危樓外一塔孤撐去鳥邊
向晚春淙亭上坐自摩蘚壁作題箋

登韜光

萬竹所窮處青山橫白雲峰高偃松影磴古錯苔紋猿
鶴渾如舊江湖不可分禪扉無客到終日戒香薰
次日復游韜光諸君畢登余坐竹林以待

暫此中途憩何須絕頂攀坐忘非學佛靜極不知山太古烟霞閱雙林日月閒泠然澗中水倘許滌塵顏

題趙次閑補羅迦室二絕句

食蜜中邊自在甜蓼辛荼苦不須嫌眼前十笏光明地笑把花枝信手拈

浮雲變滅總無心早已忘機學漢陰我愛堯夫安樂法朝朝只唱打乖吟

獨步

廊虛宜步屨徑滑漫扶筇林外雨初過花間人不逢底須煩濟勝卽此稱疎慵笑謝風塵客閒雲少定蹤

湖上

經時不踏六橋行別久湖山倍有情
筍蕨盤餐供節物
桃花籬落畫清明燈迎上冢船歸埠
雨送朝山客進城
菊郡士女至天竺進香者頂繫布袋題曰朝山
漸覺風懷讓年少不妨歸興帶
餘醒

曉起聽園中鳥聲二首

鳥啼不知春啁啾能感人人與鳥俱樂相依如比鄰
朝聞鳥聲喜暮聞鳥語新的歷調笙簧清濁高下勻
有時兩相逐相譟如怒瞋不知鳥何爲但覺鳥意馴
天機發靈蠢物我同一真因聞鳥聲善鼓我舌與脣

中庭植芳樹好鳥來宅之交交復啁啁雄雌相倡隨
人間有繒繳談笑伏禍機鳥肯來就我鳥意不我疑
上無

鷺鳥搏下無挾彈兒鳥喜呼其雛分占庭樹枝鳥雛工
語言聽之心自怡相忘不相競飲啄無是非四郊豈無
樹不如庭樹卑鳥已得其所我不如鳥爲

西湖秋柳和潘功甫

曾沂

孝廉

一番風雨一番晴無那秋光太瘦生曉起白公祠外立
聽他啼老數聲鶯

不堪憔悴鬢絲烟殘照西風又一年觸撥秋心渺何許
紅闌十二畫樓邊

一樣閒愁話六朝綠楊城郭最蕭蕭掠波記得雙飛燕

船名尋徧隋隄廿四橋

殘蟬吟透一絲涼露泣烟曉只自傷不管人間離別恨

水漢花自媚斜陽

題焦山僧雪齋竹嶼吟秋圖

海門青點一螺烟
秋在詩僧拄杖前
萬竹擁門猿鳥寂
隔江吹落磬聲圓

一肩瓶鉢自蕭蕭
閒對斜陽話六朝
何處詩情最空闊
江天小閣坐松寥

潛園消夏卽席

兼旬強半閉關多
小院濃陰稱養疴
差喜酒人工跌宕
重煩詩老亦經過
三分水抱深深竹
六曲闌遮短短荷
吟罷微涼生白葛
樽前未要雪兒歌

蘇公祠觀荷

湖波涵空兩隄夾皎若青銅揭奩匣浮螺擁出孤嶼青
繞足萬荷花四匝蘇公祠宇山之陽山色空濛一牕納
就中勝絕小瀛舟花氣涼如雨聲挾追歡暢好弄烟艇
滌暑不妨攜酒榼十年不到今乍還剩許盟鷗等閒狎
菱蒲瑟瑟風颯颯花外垂楊午陰合水妃出戲絳羅襦
雜佩明璫紛馭還舉杯酹花兼酹公回首祠成廿年恰
憑闌忽發宛轉歌漁唱菱謳遠相答跳珠白雨今似昔
容我花前欹白恰會須終老此烟波自縛竹弓來射鴨

錢蕙窗孝廉招集江月松風草堂嘗蟹殼泉

泉脈隱石中如髓包在骨養之以靈源未肯漢而溢城
南包山麓寒玉漱林樾就中最清冷蟹殼故無匹穴鉗

兩螯擎石卸八跪脫潛廬中含黃潄漵口濡沫戴筐類
石蝨爬沙肖蜉蝣腹貯秋月明氣釋炎威鬱發蒙始涓
涓有灌方汨汨串珠纍以貫酌醴甘且冽山靈甚珍重
不濫亦不竭綆汲毋乃慳瓢飲庶可必我來日方中流
汗濕鞢襪錢侯故好事瓶罌爲余出甌傾鷹爪細湯瀹
魚眼活芳馨沁肝脾冰雪濯毛髮吾杭數名泉虎跑誇
第一舌本細較量未可定甲乙我非陸鴻漸溜澗辨恐
失且聽松風鳴一療司馬渴

憶聖果寺桃

五行談儒生四輪轉佛祖地水火風外金木皆屬土木
久能自焚擺磨出蠹腐火本木之子子亦能剋母聖果

寺有桃疑年不勝數實大逾常珍味美冠芳譜每恐東
方偷不防南帝怒那知五木精陡敕六丁取摧燒徧枝
條拉雜及殿廡皮肉髹天魔脍臀灼龍部瓶中菩薩桺
不滴一絲雨土偶語桃梗同盡吾與汝迄今臯亭果時
亦飢罌甌生既同梅酸熟又帶李苦老饕餐起太息那得
杏守虎或言歲丁卯木與火齟齬此義關經術須覓漢
儒語

馬秋藥太常招集友多聞齋同訪南園遺址

已無池館屬平章剩有啼鴉噪夕陽南渡江山幾華屋
半閒堂與許閒堂

一條委巷沒平蕪泉石依然曲徑紆愛聽竹籬村犬吠

上東門外得牽無

墮地生菱怨不辭飛頭萬里已嫌遲閒愁一段憑誰問
鸚鵡雕籠菊磳詩

楊鐵崖讀書處

山花木葉作新秋
犖確來尋石徑幽
一代風流楊鐵史
紫苔繡遍讀書樓

虞楊范揭分標格
風月湖山屬霸才
鐵笛一聲秋意瘦
竹枝傳唱滿蘇臺

老婦謠成兩鬢銀
蒼茫天地一遺民
未妨略涉香奩意
屈宋文章見古春

扁舟來往稱詩仙
風景長防裂老顛
一事傲公懷抱好

太平有酒不烽烟

景福泉觀察

謙

屬題雪泉圖

奚鐵生畫

天風蕩元陰疊巘森玉骨微茫竄窳中寒澗一條出希
聲靜還無清響疎以越靈襟一傾寫幽夢墮瑤闕溪山
白模糊墟烟望中沒中有訪戴人孤艇搖兀兀

西溪秋泛三首

柳意蕭疎極鷗情浩蕩多烏篷穿窄港白舸試高歌蟬
咽殘陽瘦虹消陣雨過水村新畫稿幾筆趙鷗波
孤棹轉秦亭餘杭山送青叢蘆搖瑟瑟空水響泠泠梵
隱耽枯寂秋心入杳冥殘僧能話舊一一叩禪局
病骨迎秋健溪聲挾雨奇幽尋不暇懶處默未妨詩弄

水牽絲苻清齋擷露葵釣竿身世濶歸夢已多時

陳孟楷茂才

裴之

招同人登御教場詠古

弓刀小隊試明粧馳道中開內教場三折潮迎箭鋒直
八蟠嶺護陣雲黃已將玉斧臨河畫剩有金繒款敵忙
一片平蕪畱劫火牧兒閒臥話斜陽

表忠觀看桂花二絕句

叢祠古木太蕭森幾日秋光漸漸深樹杪青山青不得
斜陽染出淡黃金

黃雪霏霏糝徑鋪香多吹得入城無筇聲帽影西風裏
一半吟情屬外湖

題徐上舍

廷錫

秋雪圖

我愛秋雪子能作秋雪吟尋烟理孤榜秋懷澹盈襟叢
蘆蔓繁響水氣連夕陰絮飛點我衣白髮不滿簪高歌
答漁榔忘機狎沙禽白雲覆千頃窈窕不可尋是中宜
大隱只惜世網深因君話烟水堅我歸歟心

魏春岑明經

景萬

出示蔡松原焦巖雪霽圖輒題

二絕

江天潑墨鬱峻嶒珠樹瑤林粉本能不盡千巖千點雪
當時一客一枯僧

帆峭西風憶舊游狂吟飛落大江秋眼前諸老都消歇

認得先生只白鷗

上有金冬心陳玉几諸公題句
松原復有後四十年重題一詩

鄭書常徵士屬題二硯窩

玉雙其名珏貝合亦號朋何如兩端友舊德遺高曾夾
際有賢裔彪外中尤弼書膽破空馬筆力穿山鯨一窩
弄二硯半榻擁雙肱鵠浴水坑水兔食澄泥澄劫火不
能燒世寶庶可矜長供禮堂寫埽盡剡溪藤

王若溪孝廉招集吳山道院遂登丁仙閣

烟蘿深閉山之圻只合仙人來結茅極望江天橫匹練
插空樓閣倚危巢雲依成道樹邊宿門向坐忘巖下敲
丹竈藥爐須料理近來塵事漸能拋

顧沂虎兒歌

并序

顧沂直隸通州人生而奇勇居貧不擇業嘗負
米通州壩上壩上人負米恒裸跣相逐大率四

方最無聊賴之人沂雜處其間人不之奇也既去之旁縣折節讀書習舉子業中乾隆庚寅科舉人由大挑得知縣分發陝西補禮縣調城固沂性雄直樸愿上官亦無由奇之方沂之之官也衣青布衣席帽麻鞵腰大鐵椎獨身止逆旅捕役偵伺訝爲盜佯詰之沂詐不以告乃掖送捕官捕官故嘗識沂省垣大驚斥捕役曰此吾令也亟延上座自引罪將重懲捕役沂笑曰是正若輩職吾方賞之何責爲會邑有虎暴沂率衆擒虎歸檻之久之虎甚馴沂喜曰吾將以爲子虎亦帖耳就沂沂故無妻孥輒閉虎臥室與

同寢處居然若父子則甚奇也沂聽訟有狡辯者見虎伏案下目閃閃視即大懼吐實沂嘗服蟒衣假寐榻上面向壁虎錯愕疑非沂爪攫其鞶沂怒手擲虎階下觸石石碎虎幾斃沂之奇勇有如此時川楚方用兵檄沂解餉軍中卒與賊匪王三槐遇沂橫大刀牽虎直前賊驚爲神鳥獸散沂顧押餉卒皆羸弱不堪鬪獨身陷堅又衆寡異勢遂聽賊遁陝西巡撫秦公承恩聞之命沂牽虎入署曰太夫人欲觀之其後秦公嘗爲人言歎其奇不置云沂忘虎虎亦忘沂朝夕一室而僕隸恒惴惴不少安伺斃虎以藥

沂哭之真若喪其子者無何沂亦死後三年太
常卿馬先生履泰視學陝甘聞沂事而奇之歸
爲余述其事且恨不得一見沂也沂固奇虎以
異類暱就人若有知者則虎亦奇也

顧侯狎虎與虎游太常說虎先說侯四筵聳聽色飛動
木葉響震西山秋壯哉顧侯起徒步宦蹟流傳宰城固
樂城山前野草黃人識顧侯馴虎處深林叢薄虎所家
白日慘淡風吹沙戈鋌缺齧捕不得圍場士馬俱辟易
眈眈逐逐虎搏人裂眚一叱侯怒瞋雄名早懾李吹口
真虎自識裴將軍侯前虎却虎人立侯怒方張虎威戢
徒手搏虎虎不驚顧侯大笑牽虎行虎隨侯行入城市

侯氣揚揚虎搖尾虎知媚侯侯則喜景升兒子豚犬耳
不若斑奴作吾子朝呼虎兒暮呼虎兒虎解侯語侯不
虎疑不經之事古有之侯豈華林覺禪師大空小空左
右隨升堂打鼓侯決獄觸邪有虎奸吏伏侯雖武健侯
不酷泰山婦人那得哭桓桓顧侯真虎臣束縛簿領氣
不伸楚中轉饟檄侯出惜哉不聞提一軍丈夫自有馬
上槩安用毛椎老而禿橫刀牽虎穿賊營踞地吼作霹
靂聲賊聞驚潰侯徑去三五羸卒蹣跚迎傳聞侯與虎
終始虎死經年侯亦死太常持節到關中不及見侯三
載矣

題潛園吟社圖四首

出門既畏暍閉戶復苦閒張口祇飲酒倦眼聊看山惟
心無所用但坐癡與頑苟不有篇什何以排憂患獨吟
而獨謠匹若彈孤絃孤絃不成聲宮商何由宣所喜有
同調時或能往還倡余紫芝曲和君白雲篇知音定不
乏相賞松石間

往昔清平山吟侶各星散豈不有所思思之末由見窮
達分出處老醜易顏面藉有詩卷在蹤迹可覆按前年
還舊山百事廢莫辨比當鼓祥琴稍稍弄筆硯病餘心
力孱揮毫強作健寒蟬與候鳥亦各寄愁歎

作詩無性情不如不作詩奈何強塗飾羊質而虎皮西
冷風雅弊杭厲一振之近今少衰歇此道人久疑不有

千里足騏驎何由追太常

秋藥丈

七十翁神駿不可羈騷

壇樹赤幟談笑風雲馳諸公復整暇各建鼓與旗陳郎
雲小最少年力搏生象犀我方壁上觀羸師効偏裨快哉
尊俎間此樂無人知

溽暑行過半西風迓涼秋潛園多水竹庭戶日夕幽此
中無雜賓不驚池上鷗諸公肯一來吟嘯豁乾愁湖山
風日佳蠟屐方可游招邀迭賓主斗酒不待謀雲烟供
杼寫古蹟窮雕搜詩筒排日遞火急如置郵閒雲出無
心芳草綠未休政恐天壤間長此一卷畱

乙亥夏伊墨卿太守重來揚州訪焦里堂阮仲嘉
于雷塘墨卿仲嘉有詩里堂作雷塘話雨記不

三月墨卿卒仲嘉裝其詩爲一卷示余乞題卽
用兩君倡和詩韻

端憂乃作病小極憎春寒開卷淚雙落慘淡浮松烟斯
人詎云亾長吁問蒼天記與公訣別忽忽今三年賢哉
焦與阮固是公所賢出郭遠相訪丙舍傍墓田焦許公
醇儒世否吾獨然公如果復出能措斯民安卽仕驗所
學所學豈不難公與余書云近家居讀書少有所得思出而復仕以驗所學想見論
議時急雨當頭翻詩道通政事不畫陌與阮吾言并質
焦乞阮爲之緣

池上夜坐

蒼巖圍石屏隔斷一池水燈影波上搖光出巖罅裏石

屏丈許高竹木森接檐燈光落水底倒挂屋角簾夜氣
凜逼秋露滴紵衫冷獨坐數寒星殘荷動魚影

盆池疊石藝花小有意致

築成幼圃燕泥香許大經營作意忙心逐化人游不了
坐聽微雨灑均堂

偶題

雨餘吠蛤沿階鬧暑退涼蟬滿樹吟人籟悠然合天籟
詩心澹處入秋心

湖上獨游

冷紅霜後葉活碧雨中山秋色寒來艷吟懷嬾處閒漁
樵蹤跡混筆墨性情頑漸乏同游侶扁舟任獨還

是程堂二集卷第二

潛園開

仁和陸貞一訪宋書并董刊